

Beste meneer Corona,

Of loat det beste d'r moar bie weg, want wie bint oe spuugzat. Ut wöt noe tog eg tied da-j oplaazert uut ons mooje dörpjen en nog bèter uut de heele wereld, want wie bint d'r allemoale kats kloar met. Hi-j d'r wel is oaver e-dach hoe ut is um de heele dag tuus te zitt'n gaap'n? Normaal stoa'k lekker ut land te skoffel'n en dat geet un stuk bèter dan de vloere skoffel'n. Ik zatte van de wèke met de hoar'n vast tuss'n de stoeptegels en ik vège mie de konte af met ut Dèventer Dagblad. Allemaal oe skuld. Mien kaartoavound – zoon betjen de enugge meugelukheid um mien vrouwe te ontvlugg'n - mag van oe ok ah nit deurgoan. Ie hept d'r ok veur e-zörgt dat d'r gin voetbal meer is, dus soaterdags en sundags verveele ik mie te pletter en weet ie wat u met un man dut as-ze allenig moar noar vrouw'npergamma's mag kiek'n umdat d'r ok ah gin voetbal op tillevisie is? Meneer Corona, ie moss'n oe diep skaam'n.

En meneer Corona, hep ie ok weh is noa-edach oaver al die leeve winkelmeneer'n en mevrouw'n? Hoe zwoar die ut hept? Ik zagge d'r van de wèke ah ene veur de winkel gitaar spöl'n met un pette de veur um in ieder geval nog wat kwatjes bie mekare te graaj'n. En un ander kwam ah met un kollektebusse langs de deur'n um ut personeel nog te kunn'n betaal'n. Grote skande meneer Corona, zo goat wie nit met mekare umme in dit dörp.

Ie hept ut noe vast weh in de gaat'n meneer Corona: ik binne kwoad op oe, of nee, zeg moar gerust pisniedug. En a-j noe denkt da-j mie d'r onder kriegt, dan mo'k oe teleurstell'n want ik hebbe in mien lèv'n zovöille alkohol e-zoap'n, da'k vast imuun veur oe binne. De kans da'k in de brand vliege en ontploffe, lik mie un stuk grooter. Dus meneer Corona: stop d'r noe moar met, wie hept de boodskap begreep'n datte wie wat leever teeg'n mekare mot wèz'n, datte wie wat meer geduld mot hebb'n en meer van dee-j less'n dee-j ons probeert te leer'n. Meneer Corona, bedankt avaste. En eh.... a-j ons tog nog un betjen wilt treiteren, zörg d'r dan moar veur dat mien vrouwe en ik op anderhalluve meet'r van mekare mot bliev'n.....

Driek van de Oerdiek